

Avannaata Kommuniáni ukiuunerani Avannersuup eqqaanni assartuutit motorinik ingerlatillit nunaannarmi atornerarneri pillugit ileqqoreqqusaq

Assartuutit motorinik ingerlatillit atornerarneri pillugit Namminersorlutik Oqartussat nalunaarutaat nr. 10, 10. oktober 2013-imeersumi § 6, § 7, imm. 1, § 9, imm. 1 aamma § 12 naapertorlugit aalajangersarneqarpoq:

Kapitali 1

Atuuffissai il.il.

§ 1. Avannaata Kommuniáni Avannersuup eqqaanni assartuutit motorinik ingerlatillit nunaannarmi atornerarneri pillugit ileqqoreqqusaq una atorlugu aqutissat aamma ingerlaarfissat killeqarfiisa toqqarneqarnerinut malittarisassat aalajangersarneqarput.

Imm. 2. Avannersuup eqqaaniipput Qaanaaq nunaqarfiillu Savissivik, Qeqertat Siorapalullu. Nunaannarmi killeqarfia nunap assinganut ilanngussaq 1-imiippoq.

Imm. 3. Ileqqoreqqusami matumani nunaannarmi nunaminertat pineqartut tassaapput kommunimut pilersaarummi illoqarfiup nunaqarfiillu avataaniittut.

Imm. 4. Imartat, kangerluit, kuuttut tatsillu sikusarnerisa nalaani nunaannarmut ilaatinneqarput.

Imm. 5. Ileqqoreqqusami Sermersuarmut iigartartunullu Sermersuarneersut kiisalu Pituffeersunut atuutinngilaq.

§ 2. Motorinik ingerlatillit ileqqoreqqusami pineqartut tassaapput angallatit motorillit suulluunniit sikukkut, aputikkut, qaqqakkut nunaannakkullu ingerlasinnaasut, matumani ATV-t, illiniliuutit qamuteralaallu ilanngullugit.

§ 3. Atuisussaatitaanermik nalunaaruteqartariaqartumik aqqusinerni, unittarfinni narsaatinilu il. il. angallanneq, pilersaarusiornermut inatsit naapertorlugu, ileqqoreqqusami matumani atuutinngillat.

Imm. 2. Nakkutilliinermut oqartussaasut avatangiisinik pinngortitamillu nakkutilliinerannut, annaassiniarnerannut, politiit misissuinerannut, illersornissaqarfiup suliaqarnerannut assigisaannullu tunngasut ileqqoreqqusami matumani atuutinngillat.

Imm. 3. Sumiiffinni, angallatit motorinik ingerlatillit atorlugit angallannermut inatsisit allat aqutugalugit maleruagassiuiffiusuni, maleruagassiat sukkulluunniit killilersuiffiunerusut atuutissapput.

Kapitali 2

Nunaannarmi motoorinik ingerlatilinnik atuineq

§ 4. Nunaannarmi angallatinik motoorilinnik angalaneq taamaallaat kommunalbestyrelsip akuerisaatut ukiuunerani angallavissatut akuerisaani aamma ukiuunerani angallannermut aqutissiani akuerisaapput, takukkit ilanngussat 1-8.

Imm. 2. Angallannermut aqutissiani nalunaarsukkani aamma angallavissatigut angallatinik motoorilinnik angalaneq taamaallaat ukiuunerani 1. oktobari-31. maajimi pisinnaavoq.

Imm. 3. Angallatit motoorillit nunakkoortillutik ajutoorsimassappata, naggorissutsimut nunamullu uuliakooratarsinnaaneq imaluunniit orsussamik aniasooratarsinnaaneq pitinnagit peerneqassapput. Angallatit motoorillit Kommunalbestyrelsimit peeqquneqareernerisa kingorna peerneqanngippata, piginnittup akiligaanik Kommunalbestyrelsimit peersinneqarsinnaapput.

Kapitali 3

Angallannermut ataatsimoortumik aalajangersakkat

§ 5. Ukiuunerani assartuinnermut aqutissatut ukiuuneranilu angallavissatut toqqarneqartuni nunap qerinerani, apummik qallerneqarnerani aammalu naasunut nunamullu ajoqusiiviusinaanngitsumik angallavissaalernerani angalanissaq inerteqqutaanngilaq.

Imm. 2. Angallatinik motoorimik ingerlatilinnik imeqarfiup killeqarfiata iluani angallanneq inerteqqutaavoq.

Imm. 3. Imm. 1-imi aalajangersakkat imaani sikukkut, kangerlukkut, kuukkut tatsikkullu angallanneq atuutinngilaq.

§ 6. Nunaannarmi angalanermi naasunut aseruutaasinnaasumik sangupiloorfigineqasannngilaq, aallarsarfigineqasannngilaq unipiloorfigineqassanani luunniit.

Imm. 2. Kuuit sinaat uingarnillu kiisalu tatsit killingi, kuuit annerit kiisalu kangerluit ikaarneqartassapput, naasut nunallu ajoquserneqarfissarinngisaasigut.

Imm. 3. Angallanneq naasut uumasullu sianigalugit pissaaq. Nunami immamilu uumasut miluumasut illersornissaannut piniagarinissaannullu qaqugumulluunniit atuuttutut nalunaarutit malittarineqassapput.

Imm. 4. Qimussinut ungasissusissat sapinngisamik minnerpaamik 10 meterinik ungasissuseqassooq.

Imm. 5. Angallannermi aqutit nunap assingatigut sapinngisamillu aqutitigut nalunaaqutsersuinikkut kommunimit isumagineqassapput.

Kapitali 4

§ 7. Pisuni immikkut ittuni ilanngussa 1-8-p avataani assartuutit motorinik ingerlatillit atorlugit aqutissatut akuerisani angalanissamut kommunalbestyrelse immikkut ittumik akuersissuteqarsinnaavoq.

Imm. 2. Immikkut ittumik akuersissuteqartoqarnissaanut qinnuteqaat tunngavilersugaq angalanissaq pilersaarutaasoq kingusinnerpaamik sapaatit-akunnerinik sisamanik sioqqullugu kommunalbestyrelsimit tiguneqarsimassaaq aamma nunaminertanik imaluunniit aqutigisassanik takutitsiviussalluni.

Imm. 3. Kommunalbestyrelse immikkut ittumik akuersissuteqarnermut atatillugu naapertuuttut isigineqarsinnaasunik piumasaqaateqarsinnaavoq.

Imm. 4. Immikkut ittumik akuersissutit Avatangiisinut Naalakkersuisumut ilisimatitsissutigineqassapput.

Imm. 5. Imm. 1 aamma imm. 2 naapertorlugit akuersissutit sukkulluunniit kommunalbestyrelsimit imaluunniit Naalakkersuisunit allanngortinneqarsinnaapput utertinneqarsinnaallutilluunniit, immikkut ittumik akuersissuteqarnissamut piumasaqaatit unioqqutinneqarpata, imaluunniit kommunalbestyrelsip Naalakkersuisulluunniit naliliinerat malillugu pissutsit pinngortitamut avatangiisinullu ajoqusiinnaasut pineqarpata.

Imm. 6. Immikkut ittumik akuersissutit ukioq ataaseq tikillugu tunniunneqartarsinnaapput.

§ 8. Kangerluup aamma imartap sikuani angallannermi siku sinna atuarlugu piniarneq aamma immami uumasut miluumasut akornusersornissaat pinngitsoorniarlugit siku sinnaanumut ammaan-nartumik imartaqarfilinnut sapinngisamik siamasissuutit meterinik 500-nik ungasissuseqartoqassaaq.

Imm. 2. Timalittut pissutsit siku sinnaanumut meterinik 500-nik ungasissuseqartitsisin-naanngippata siku sinnaanumut sapinngisamik ungasinnerpaamik ungasissumiittoqassaaq.

Imm. 3. § 7, imm. 1-imi pinngitsuugassaaq tassaavoq siku sinna atuarlugu angallannermut aqutissianik toqqaasoqarsimanera.

Imm. 4. Siku sinna atuarlugu aalisartarfinnut taakkunaniillu angallannermut, kiisalu siku sinnaanumut piniarnermit angallannermut imm. 1 aamma imm. 2 malillugit siku sinnaanumut meterinut 500-nut naleqqiullugu qaninnerusumik angallannissamut inerteqqussutit atuutissanngillat.

Kapitali 5

Nakkutilliineq il.il.

§ 9. Kommunalbestyrelsip nalunaarummi uani malittarisassat malinneqarnersut nakkutigissavaat.

Imm. 2. § 5-imi, imm. 1 aamma 2 angalanermut maleruaqqusat piffissap ilaani

naammasineqarsimangippata kommunalbestyrelse inerteqquteqarsinnaavoq peqqussuteqarsinnaallunilu.

Imm. 3. Peqqussutit tassaasinnaapput angallaviit aalajangersimasut atorineqarnissaannik piunasaqaatit.

Imm. 4. Inerteqqutit tassaasinnaapput sumiiffinni aalajangersimasuni piffissami aalajangersimasumi angallannerup tamarmi unitsinneqarnissaannik piunasaqaatit.

§ 10. Nalunaarut manna naapertorlugu aalajangikkat tamarmik Avatangiisit innarlitsaaliorneqarnissaat pillugu Inatsisartut peqqussutaanni nr. 9-mi, 22. november 2011-meersumi kapitali 14-imi malittarisassat naapertorlugit naammagittaalliutigineqarsinnaapput.

Kapitali 6

Pineqaatissiinermut aalajangersakkat

§ 11. § 4-mik, § 5-imik aamma § 6-imik unioqqutitsineq akiliisitsinermik aamma/imaluunniit arsaarinninnermik kinguneqarsinnaapput.

Imm. 2. Piunasaqaatinik, § 7, imm. 3 naapertorlugu aalajangersarneqartunik unioqqutitsineq akiliisitsinermik kinguneqarsinnaavoq.

Imm. 3. § 8, imm. 2-4 naapertorlugit peqqussummik imaluunniit inerteqqummik unioqqutitsineq akiliisitsinermik kinguneqarsinnaavoq.

Imm. 4. Ileqqoreqqusatigut akiliisitsinermik kinguneqartitsinermi, Kalaallit Nunaanni pinerluttulerinermi inatsimmi malittarisassat malillugit inatsisitigut pisinnaatitaasumut akisussaatinneqarsinnaapput.

Imm. 5. Imm. 1-4 naapertorlugit akiliisitsissutit Nunatta Karsianut nakkartinneqartassapput.

Kapitali 7

Atuutilerfissaq

§ 12. Ileqqoreqqusaq una atuutilissaaq ulloq 24.02.2021.

Avannaata Kommuniani Kommunalbestyrelsi, ulloq 19.02.2021

Palle Jerimiassen

Borgmesteri